



國朝耆獻類徵初編



明倫彙編
家範典
卷一百一十五



國朝耆獻類徵初編卷六十七目錄

卿貳二十七

楊永斌

牛鈕

馬會伯

魏方泰

于定國

楊汝穀

沈近思

卞永譽

補錄

楊永斌

謝永成

蘇毅

才永豐

謝永成

謝永成

謝永成

謝永成

謝永成

謝永成

國朝耆獻類徵初編卷六十七

通奉大夫前署江西巡撫江西布政使司布政使湘陰李桓輯
卿貳二十七

楊永斌

楊永斌雲南昆明人由舉人於康熙四十五年授廣西臨桂縣知縣丁憂服闋補直隸阜平縣知縣六十年調大城縣六十一年因緝犯不力革職雍正元年二月詔復職七月遷涿州知州三年奉旨楊永斌才守俱優著授貴州威甯府知府六年遷貴東道七年擢湖南布政使九年四月調廣東布政使七月以前威甯府任內隨征米貼逆苗議敘軍功加一級十月疏言律禁鐵器出洋

近因廢鐵可鎔製兵械一體嚴禁惟鐵鍋尚准洋船貨賣臣查出日船少者百連多者千連每連二十斤一經鎔鍊器械無不可爲請照廢鐵例禁諭曰此奏甚是足見畱心地方庶務十年三月署廣東巡撫五月疏言水師戰船全賴旋纜維繫聞浙省每船設旋三門遇風浪三門並拋船藉安穩又籐纜易脆裂不若檣之繇固粵省外洋艚船拖風各船旋纜多不畫一請增旋三門盡改檣纜又言粵東不乏可墾之土而民間不勤稼穡致米價昂貴臣仰體皇上重農至意飭屬勸墾其高亢不宜禾稻者令樹藝豆麥山麓偏坡亦酌栽所宜木植至惠潮兩府向多獷徒見招墾大官田荒地免蹈法網所墾田成熟後歲可得官租千餘石歸粵秀書

院爲膏火均得 旨嘉允九月實授十一年疏言粵東省城商船雲集俱在南海縣屬之佛山鎮貿易距縣治五十餘里鞭長莫及向設五斗口巡司一員職微不足彈壓請改設同知其巡檢移駐平洲堡巡緝 詔如所議行十二年五月疏言教官與諸生最切近平時不加訓迪徒以無優劣具結塞責遇生監有違犯經府州縣審出則補詳劣行巧爲掩飾請嗣後有似此者以溺職糾參如三年內能使生監並無過犯或隨即據實詳報准予題升九月疏言臣遵 旨勘明可墾地六千八百餘頃此外或山深箐密或夾沙帶鹵體察民情不但懼費工本兼恐磽地薄收糧賦無出臣思膏田產穀雖少若多墾數十萬畝年豐可得數十萬石卽年歉亦

必稍獲於民生實有裨益宜多方勸導以盡地利查廣東省惟新甯縣糧額內有斥鹵輕則一畝徵銀四釐六毫四絲米四合二勺六秒仰懇 聖恩凡承墾磽瘠之地槩准以斥鹵輕則輸糧卽給照爲業十年起科混冒按律治罪庶沃壤不致冒承輕則而磽地亦知田糧易輸阡陌自廣均下部議行乾隆元年六月疏言揀選題補人員例限一月查取印結不能於一月內辦理或具題後補取印結送部又徒爲具文請刷後揀選升調人員卽於該管上司季報冊內摘取政績考語入奏毋庸展轉取結致逾定限至題報丁憂病故亦請以題咨開缺之日起限一月揀選調補九月疏言大清會典開載凡買田地房產例用布政使契尾後改用契紙

今契紙已革而契尾未復臣思契尾係投契時官爲印給不同契紙另需民間價買滋擾請仍舊例由布政使編發各地方官黏民契後鈐印給發每歲奏銷時將用過契尾數目申報藩司查考其稅銀如有盈餘仍令儘收儘解庶民無觀望而官吏侵收與奸民捏契之弊可杜部議如所請行二年三月調湖北巡撫九月調江蘇巡撫三年四月疏辦松江太倉所屬塘工五款一奉賢南匯上海寶山四縣因築塘取土成渠雨積旣漫民田又易浸損塘根臣親勘形勢開河一道南接華亭運河北達寶山高橋卽以所起之土培築塘身並設木橋利濟一華亭金山嘴地方偪臨洋面外有金勝三山聳峙海中潮勢直射塘腳雖於內築排椿石壩不足以

資捍衛請從外廢塘缺口處增築石壩南接舊塘爲重門保障一
華亭縣外護土塘內倪家路一帶形勢灣兜納潮受衝亦屬險要
舊塘宜加寬厚一寶山縣西浦見加築土塘自姚家墳至城東一
帶雖係險要然塘腳日漸漲沙可保護毋庸興築石坦坡惟楊家
嘴礮臺處正當東北海洋潮勢衝險請將礮臺移築百丈內卽舊
基改石塘三百丈一江南沿海最險之工莫如寶山請建海神廟
虔祀恭請 皇上御製碑文扁額垂永久部議 從之五月 諭
曰楊永斌久膺外任聲名素優是以用爲江蘇巡撫近聞伊年將
七旬精力不逮難勝繁劇之任著來京署禮部侍郎事務十月授
吏部右侍郎四年因病乞休 命以原品休致五年卒孫瑾官浙

江按察使

右 國史館本傳

滇南山水崎嶇甲天下余嘗有事於其閒意必生閒世偉人出其
才華以黼黻上理否則建非常之業以翊佐乎休明前此未之聞
也風塵中得一人曰陟山楊公公守黔中與余論開疆撫夷諸事
輒多奇中自時厥後公且建牙東南入爲卿貳曾日月幾何而公
已下世余亦忽忽將老矣其遺孤萬里上書於余曰先王父旦夕
寃寥懼生平行實不傳也然先王父受知於公二十稔矣願得一
言以納諸竈余揣無以張公也惟敘所知以傳焉公諱永斌字壽
廷陟山其別號也先世江西贛州府甯都縣人自始祖辛明初南

征授武略將軍遂家昆明世襲千戶六傳之秉元歙縣令八傳之崇德定遠縣學博崇德生文學順成順成生文學寓乾是爲公考後以公貴三世皆贈資政大夫公考故遂學滇亂隱於岐黃術活人無算以孝行崇祀三綱祠生子二次景斌邑廩生長卽公也誕彌厥月有奇瑞生四歲太夫人陳卒鞠於祖母姚年十八補博士弟子員丙子食餼己卯登乙榜兩赴春官不第就四省效力例授廣西臨桂縣令以艱歸再起直隸阜平令宰阜七年調大城令以吏議落職當世宗憲皇帝卽位復公大城令旋擢涿州牧不一載擢守貴州威甯府方余之節度南中也與公相遇軍書旁午閒余初未有奇公及臨事周諮有司雜選諸郡訥訥然無所建白

公亦未嘗標異於眾退而陳是非辨利病若燭照數計而龜卜也
若駕輕車就熟路也然後知公寓精明於渾厚之中者殆滇黔第
一人歟余深爲地方慶亟薦公於上而上已嚮用公遂進公
貴東道糧驛副使權貴西道及按察使更進湖南布政使調任廣
東遷巡撫撫粵六年今上龍飛命兼攝兩廣總督入覲改撫
湖北兼攝湖廣總督移撫江蘇旋召入都署禮部侍郎更授吏
部右侍郎以年老請於朝致仕嗚呼以一縣令歷三十年而位
列少宰不可謂不貴矣吾見賢士大夫自有司而起莫不身歷民
閒備悉閭閻疾苦而其身亦幾經盤錯可任矣當艱鉅之投斷未
有隨眾苟容而不拔於風塵之表者也況公之才智有大過人者

始公宰臨桂宰阜平宰大城皆有神君之號後以捕內監陳進忠
爲居奇攫之吏議遂罷職公弗爲辨也卒邀上知而得白及將
赴威甯召見養心殿溫語移時賜賚無已威甯與烏蒙鎮
雄鄰土司不靖余檄公與武弁行視邊疆公單騎馳入撫慰而出
烏蒙米貼之役以公贊軍務多所咨畫卒定兩府比在楚南六里
頑苗爲患公建議請撫果不煩一矢而定其因地制宜如此初粵
東文武羣僚相牴牾悟黨援門戶之風未能盡滌故上特以公自
藩進撫公一洗從前之陋坦衷共事人無不盡其情而宦習爲之
易粵之爲地山海環焉土不加闢而生齒日繁商賈輳集逐利如
鶩無業者挈妻子入蜀就食狡者則流而爲盜出沒海澨捕者莫

誰何也公行察疆土勸種植蠲墾大官田歲入官租資粵秀書院膏火定程訓士文行交修鶴山恩平諸屬覈墾至數千頃復以斥鹵之餘猶堪藝稻乃請於上出示境土招集流民續得百一十餘萬畝給牛種禁豪右侵漁俾有恆產輕賦而緩其徵無業者樂就近地以自給曲江乳源向盜藪也公檄監司親入山中宣化愚蒙眾悉引首待命招之使降又從而撫字焉其梗者捕而置之法盜遂息先是粵洋地接洋人在粵開天主堂習述爲奸洋舟來泊會城粵民爲之煽惑各廢本業公奏聞而驅之澳門洋人遠而粵民安肇自公始也嘗上積貯墾田捕盜安民十餘疏皆采世宗硃批諭旨書中攝制府則舉落地漁船埠稅與海關之耗規分

擔諸羨餘以數萬計悉奏汰之及自粵入都 今上召見 南書

房 賜坐 賜茶 賜克什 賜宴 賜御書三十卷 賜御馬

鞍轡各一乘自 午門而出 榮寵之賁皆以公老成練達故也

泊撫楚嚴保甲繕城堡課農桑增社粟除巨猾興學校井然有法

其治吳也賑沿淮修隄漁民豁高渚馬場賦躬履松江太倉塘工

濬河增壩爲經久計凡實利於民者以次興舉後官其地者多所

取法而民用大和 上方倚公爲重欲使公待漏巖廊修顧問密

勿之參指日可卜而公以貳卿求退疏再上乃 給假還里 陛

辭日 諭畱再四不獲 命盤道經藩庫閱滇省兵亟專奏余時

奉 命查勘運河舟次淮上與余相見述往昔相得之歡未嘗不

歎羨公功成身退容與自如也乃歸未二年而公卒嗚呼公殆近
世任事之臣歟方朝廷講求治安安得公輩數人擔負封疆之
責天子獲端拱穆清而成化跡公生平所爲豈復齷齪齷齪行
故事而已哉公少事祖母與父及繼母最孝兩叔父寓坤寓泰失
怙而幼公爲之畢婚媾籌家計弟早逝鞠育其二子文賜文河成
名性甘淡素圖書之外他無所嗜其在林下也猶冀其出以經濟
翊佐休明不謂拙簪林壑忽抱春相之哀而余尙戀笏紳無由結
九老之社則余感慨係之矣公生康熙九年庚戌七月初七日亥
時卒乾隆五年庚申十一月十八日亥時壽七十有一階資政大
夫配夏袁皆封夫人子二長文錫歲貢生候選府通判先公卒